

Meeqqat atuarfiani naammassisut inuuniarnermikkut piginnaasakkullunniit patsiseqartumik ilinniagaqalinngitsoortartut perorsimanerulernissaat piginnaangorsarnissaat piumassuseqarnerulernissaallu siunertaralugu Naalackersuisut misissuinissamik aallartitseqqullugit Inatsisartut aalajangiiffigisassaattut siunnersuut. Misissuineq 2015-imi upernaakkut ataatsimiinnermi nalunaarusiamik agguaassinermik inernejassaaq.

(Inatsisartunut ilaasortaq Evelyn Frederiksen, Siumut)

Akissuteqaat

(Ilinniartitaanermut, Ilageeqarnermut, Kultureqarnermut Ilageeqarnermullu Naalackersuisoq)

Siullermeerinnineq

Siunnersuuteqartup siunnersuutigaa meeqqat atuarfiani naammassisut inuuniarnermikkut piginnaasakkullunniit patsiseqartumik ilinniagaqalinngitsoortartut perorsimanerulernissaat piginnaangorsarnissaat piumassuseqarnerulernissaallu siunertaralugu Naalackersuisut misissuinissamik aallartitseqqullugit Inatsisartut aalajangiiffigisassaattut siunnersuut. Misissuineq 2015-imi upernaakkut ataatsimiinnermi nalunaarusiamik agguaassinermik inernejassaaq

Inuusuttut amerlasuut meeqqat atuarfianni naammassereernermi ilinniagaqalerneq ajortut kiisalu inuusuttunut taakkununga paasisimasaqarluni suliniuteqartoqartariaqartoq pillugit siunnersuuteqartoq Naalackersuisut isumaqatigaat.

Taamanikkut Inuusutissarsiornermut Suliffeqarnermullu Naalackersuisoqarfiusup nassuiaat augustimi 2012-imi naammassivaa: ”Inuusuttut 25 ataallugit ukioqartut ilinniarnissamat suliffeqarnissamullunniit piareersimanngitsut pillugit nassuiaat”. Ilinniartitsinermut pilersaarummi II-mi Naalackersuisut anguniagaasa anguneqarnissaannut tunngatillugu Kalaallit Nunaanni unammilligassat ilaannik nassuiaat takutitsivoq ”... ukioqatigiit 2015-imit meeqqat atuarfianni naammassisut 35-inik ukioqalertinnatik inuusutissarsiutinut piginnaasaqalerfiusumik ilinniarsimasut 70 %-iussapput”. Anguniagaq taanna anguniarlugu sinneruttut/inuusuttut anguniakkat ikilisinneqarnissaat inuusuttullu ilinniarnermik aallartitsisut amerlanerunissaat pisariaqarpoq. Inunnik isumaginninnermi ilaqutariinnillu sullissinnermi meeqqanut inuusuttunullu immikkut sammisunik suliniuteqarneq ingerlavoq aamma Ilinniartitsinermut pilersaarut II sinneruttunut/inuusuttunut anguniakkanut sammisunik suliniutinik arlalinnik aallartinneqarnikunik pilersaarutigineqartunillu imaqarpoq:

Taakkuninnga paasiniaaneq

Sinneruttut/inuusuttut anguniakkat paasiniaavigineqassapput, taamaalilluni siunissami inuusuttunut anguniakkanut inisseriaannarnut inuusuttunillu tassaneereersunut tunnganerusunik suliniutit suliarineqarsinnaaniassammata.

Paasiniaaneq 2013-imi aallartinneqarpoq 2014-imilu ingerlaqqissalluni.

Højskoleniinneq efterskoleniinnerlu

Inuusuttut meeqqat atuarfianni naammassereernermi ilinniaqqinnissamat oqaatsitigut ajornartorsiuteqartut imaluunniit piginnaasanik amigaateqartut Danmarkimi højskolemiinnermi efterskolemiinnermilu taakkuninnga piginnaasaqalernissaat suliniummi qulakkeerneqassaaq.

Suliniut 2013-imi aallartinneqarpoq kommuninilu tamani suliniutip ingerlanneqarnerani 2014-imi ingerlaqqissalluni.

Inuusuttut ilinniarfiinut piareersarneq

Inuusuttut assersuutigalugu oqaatsitigut ilinniartitsissutini piginnaasaqannginnertik pissutigalugu meeqqat atuarfianni naammassereernermi toqqaartumik inuusuttut ilinniagaannut ingerlaqqinngitsut piareersarnissaannik suliniuteqarneq Naalakkersuisut ingerlateqqinniirpaat. Tamassuminnga nalilersuineq Naalakkersuisut aallartinniirpaat tamassuminngalu akisussaasussamik toqqaaniarlutik.

Inuusuttunut ilinniarfinni inissanik ilasigallarneq

Suliniutimmi tassani innuttaasut amerlanerusut ilinniagaqarnissamut periarfissinneqassapput. Inuusuttunut ilinniarfinni ullumikkut inissat imatut amerlatigaat inuusuttoqatigiit tamarmiusut ukiut tamaasa meeqqat atuarfianni naammassisut ilinniarnermik aallartitsilluarsinnaallutik. Kisiannili innuttaasunut suli ilinniagaqalinngitsunut inissaqartitsinissamik aamma pisariaqartitsisoqarallarpoq. Inissaqartitsinissamik suliaqarneq 2014-imi aallartinneqassaaq.

Iltersuisarneq

Pitsaannerusumik iltersuisarneq qulakkeerniarlugu pitsaannerusumik nunalu tamakkerlugu iltersuisarnermik ilinniartitsineq pillugu pilersaarummi II-mi suliniut Naalakkersuisut ingerlateqqinniirpaat. Iltersuisarnerup pitsanngortinnissaa tassani siunertaavoq, amerlanerusunik pitsaannerusumillu iltersuisartutut ilinniarsimasoqarnissaata qulakkeerneratigut aammalu inuusuttut iltersorneqarnissamik pisariaqartitsisut iltersorneqarnissaasa qulakkeerneratigut.

Suliniuteqarfinni taakkutut ittuni uku ingerlanneqarput:

- Meeqqat atuarfianni iltersuisartunik pissarsiaqarnissamik misiliilluni aqqissuussineq
- Ikaarsaariarnermik nunaqarfinni iltersuisarneq
- Ujartuilluni iltersuisarneq
- Nuna tamakkerlugu iltersuisarfimmik pilersitsineq taanna tassaassalluni nuna tamakkerlugu tarnip pissusaatigut inuttullu atukkatigut ilinniartunik siunnersuisarneq, qitiusumi iltersuisarnermi suliasat kiisalu iltersuisartunik ilinniartitsineq.

Ilinniartitsinermut pilersaarummi II-mi suliniutit saniatigut Niuernermik ilinniarfik Nuuk inuusuttunut inuussutissarsiutinut ilinniarnermik aallartitsinissamik ajornartorsiuteqartunut tunngasunik suliniutinut aningaasaliiffigineqarpoq.

TNI Flex

Niuernermik ilinniarfik TNI Flex-ip ineriartortinnissaanut aningaasaliiffigineqarpoq. Ilinniartitsinermi sinneruttut/inuusuttut anguniakkat sullinniarneqarput. Ilinniarneq allaanerusumik tunngaviummik ilinniarnaruvoq, tassani inuusuttut ataasiakkaat pisariaqartitaat annertunerusumik isiginiarneqassallutik. TNI Fleximi inuusuttut tassunga piareersutut nalilerneqaraangata TNI-mi ilinniavinnissamut piareersarneqassapput. Taamaalilluni TNI-mi ilinniarnermik aallartitsisitsisarneq tamatigoornerulissaaq, kisiannili ukiumi ataatsimi ilinniartut ataasiakkaat assigiinngiiaartumik atuarnerat sivilisunerpaaffeqassalluni.

Summer School

Niuernermik ilinniarfik Nuuk aamma aallarnisaalluni suliniutip ”Summer School”-ip ineriartortinnissaanut ingerlannissaanullu aningaasaliiffigineqarpoq, tassani peqataasut sapaatit akunnerisa sisamat ingerlaneranni meeqqat atuarfianni ilinniartitsissummik inaarutaasumik soraarummeernissamik neqerooruteqarluni sakkortuumik

ilinniartinneqassallutik, taamaaliornikkut inuusuttut ilinniarfiit ilinnialernissamut piumasaqaataannik naammassinnissaat qulakkeerneqassalluni.

Qulaaniittuni ersippoq Naalakkersuisut ilisimagaat sinneruttut/inuusuttut anguniakkat ikilisinniarlugit ilinniartinniarlugillu suliniuteqarnissaq pisariaqartoq kiisalu taamatut suliniuteqarneq aallartinneqareersoq. Taamatut suliniuteqarnermi oqaatigineqareersutut ilaatigut ilaapput inuusuttut taakku sunniutillu allaaserineqartut assigiinngitsut paasiniarneqarnissaat Naalakkersuisullu meeqqanut inuusuttunullu siusissukkut suliniuteqartarnissaq isiginiaraat tassunga ilanngullugit inuttut atukkani pissutsit ilikkagaqartarnerullu pingaaruteqassusia.

Suliniutit aallartinneqareersut nutaallu pillugit 2015-imi upernaakkut ataatsimiinnermi agguanneqarsinnaasumik Naalakkersuisut nassuiaasiorusupput. Taamaammat aalajangiinissatut siunnersuutip akuerineqarnissaa Naalakkersuisut inassuteqaatigaat.